

**Aningaasanut inatsimmi konto pingaarneq 64.01.05 naapertorlugu inuussutissarsiutitigut nunaqarfinnut isorliunerusunullu siuarsaanermik tapiissutinik suliassap ulloq 1. januar 2020 aallarnerfigalugu Namminersorlutik Oqartussanit kommuninut nuunneqarnissaanik, apeqquutillu tassunga attuumassuteqartup 2019-ip ingerlanerani kommuninik ataatsimoortumik tapiissutinik isumaqatiginninniarnermut ilanngunneqarnissaanik Naalakkersuisut peqquneqarnissaat pillugu Inatsisartuni aalajangiiffigisassatut siunnersuut.**

(Inatsisartunut ilaasortaq Aqqaluaq B. Egede, Inuit Ataqatigiit)

### **Akissuteqaat**

(Inuussutissarsiornermut, Nukissiuuteqarnermut Ilisimatusarnermullu Naalakkersuisoq)

### **Siullermeerneqarnera**

Inatsisartuni ilaasortap Aqqaluaq B. Egedep aalajangiiffigisassatut siunnersuutaanut Naalakkersuisut sinnerlugit qutsavigaara.

Konto pingaarneq 64.01.05-imi 2019-imi ukiumi naatsorsuiffimmi koruunit 13,12 mio. immikkoortinneqarput. Taakkunanit kommunini nunaqarfinnut isorliunerusunullu inuussutissarsiutitigut siuarsaanernut koruunit 5,89 mio. immikkoortinneqarput. Aammattaaq kontomi pingaarnermi Neqi'lu kiffartuussinissamik isumaqatigiissummut, kiisalu nunaqarfinni il.il. tunisassiorfinnik ingerlatsinissamik isumaqatigiissutinut aningaasaliissutinik koruunit 5 mio. atugaapput.

Kommuninut inuussutissarsiutinik siuarsaanernut tapiissutit 5,89 mio. kr. tassaapput agguaassassat atugaalluartut, nunaqarfinni isorliunerusunilu siuarsaanermik pilersitsisut. Assersuutigalugit attaveqarfinnik iluarsaanernut, inuussutissarsiorfinni siuarsaanermi ingerlatsivinnik illunillu sullissivinnik iluarsaassinernut aamma pisiortornernut, takornariartitsinermi najoqqutassalianut, kiisalu pikkorissartitsinernik, isumasioqatigiissitsinernik il.il. aaqqissuussaqaarlunilu ingerlatsinernut suliarisanut aningaasaliissutit atorneqarsinnaapput.

Nunaqarfinnik suleqateqarlutik suliniutit sorliit tapiissuteqarfiginissaannik kissaateqarfiusut allattorsimaffiannik suliqaartartut tassaapput kommunit. Taamaattumik siunnersuutit Naalakkersuisunit pisarneri eqqortuunngilaq.

2018-imi nunami nunaqarfinni isorliunerusunilu siuarsaanermik aamma inuutissarsiorfinnik ineriartortitsinermik agguaassassat pilersitsisooqataapput. Kujataani savaatillit aqputaat sanaartorfiupput, taamaalillutik savaatilinnut ingerlatsilluartunut tamakkununga ulluinnarni

atugaannik iluaqutissiillutik. Aammattaaq Kujataa tulattarfinnik puttasunik amerlanerusunik agguaassassanit pisuunnguallatsinneqarpoq. Taakku nunap immikkoortuani takornarianut najukkanilu innuttaasunut angalasarnermik oqilisaaqataapput.

Kommuneqarfik Sermersuumi nunaqarfinnut agguaassassat ilaatigut nunaqarfinni aqutsisut isumasioqatigiissinneri periarfississimavaat.

Aamma Qeqqata Kommuniani agguaassassat nunaqarfinnut kivitsisimapput, soorlu Napasoq, Atammik, Kangaamiut, Sarfannguit Itillerlu tulattarfinnik puttasunik nutaanik pissarsisimallutik.

Kommune Qeqertalimmi ilasamik siuarsartitsinermut tunngavissamik pilersitsisoqarpoq, Kangaatsiami cementiliorfimmuut puisillu amiinik tigooraasarfimmuut tunngasunik suliniummut tapiissuteqartoqarsimammat.

Kiisalu Qeqertani qanoq ililluni qullukkiornermik pilersitsisoqarsinnaaneramik Avannaata Kommuniani sammisaqartoqalernissaa agguaassassat tapersersuiffigisimavaat.

Tassaapput suliniuterpasuit tamakku ilaanngui, nunaqarfinnut agguaassassanit piviusunngortinneqarsimasut. 2019-imi nunaqarfinni isorliunerusunilu siuarsaarnermik pilersitsiniarnermik suliaqarneq nangingneqassaaq, suliunitillu arlalissuit tapersersornissaat pilersaarutigineqareerput, soorlu puisit amiinik pilattaavinnik pitsanngorsaaniissat, nunaqarfinni isorliunerusunilu innuttaasut inuutissarsiutinik pikkorissartinnissaat, takornarianut allagartalersuutit, kiisalu suliniutit allat arlalippasuit.

Taamaattumik suliniutit arlallit nunaqarfinni isorliunerusunilu piviusunngortinnissaannut agguaassassat aalajangiisuulluinnarput. Taamaattumik nunaqarfinni isorliunerusunilu suliniutinut qinnutigisaasunut tamakkununnga aningaasaliissutit tunniunneqarnissannik aaqqissuussamik ingerlanneqartuarmillu malittarinnittoqarnissaa qitiutillugu sammisarineqarpoq.

Taamaattumik agguaassassat maannakkut aqutarinerini iluaqutaasoq tassaavoq aningaasaliissutit aalajangersimasunut tutsittarnissaat, nunaqarfinnilu aamma isorliunerusuni suliniutinut eqqarsaatigisaasunut tamakkununnga toqqaannartumik ingerlasarnissaat. Paarlattuanik aningaasaliissutit kommuninut ataatsimoortumik tapiissutinut ilaalissappata immikkut ittutut siunertanut atuuttussaajunnaassapput, akerlianik sumulluunniit atornerqalersinnaalissallutik. Taamaalilluni nunaqarfinni isorliunerusunilu atugassatut aningaasaliissutit tutsittarnissaat pillugit qularnaarissuteqaraniluunniit piumasaaqateqartoqarunnaassaaq. Taamaattumik nunaqarfinni aaqqiissut assorsuaq

nuannarineqarlunilu iluaqutaasoq piviusutigut tammavittussanngornissaa aarleqquteqarfiulissaaq.

Konto pingaarneq 64.01.05-ikkut Neqimut 5 mio. kr.-nik kiffartuussinissamik isumaqatigiissut toqoraasarfiup ingerlanneqartuarnissaanut aalajangiisuulluinnarpoq. Nersutininik toqoraavik Kujataaniippoq, suliffeqarfiullu ingerlanneqarnissaa qularnaarniarlugu aningaasaliissutinik tamatumunnga tuttussanik pissarsisarpoq. Koruunit 5 mio. taakku peerneqassappata nersutininik toqoraaviup ingerlatsinermis unitsittariaqarneranik tamanna nassataqassagunassaaq, ingerlatseqatigiiffiup taarsigassarsiaanik kiffartuussiviginninnissaaq ingerlassinnaajunnaassammassuk.

Taamaattumik konto pingaarneq 64.01.05-imit aningaasaliissutit Namminersorlutik Oqartussanit kommuninut ataatsimoortitatut tapiissutinut nuunneqassappata nunaqarfinni isorliunerusunilu inuutissarsiorfiit ineriartortinnissaanut aningaasaliissutinik tutsitassanik siunissami ikinnerusoqarnissaanik tamanna nassataqarsinnaavoq. Suliniutinik piviusunik naammassineqartussanik tamakkuninnga ullumikkut kommunit nunaqarfiillu suliaqareersuunerat tassunga atatillugu eqqaamaneqassaaq. Nangillugu Narsami savaaqqanik toqoraasarfimmik Neqip matusisariaqarnissaa aarleqqutaalissaaq, ingerlatseqatigiiffillu kiffartuussinissamik isumaqatigiissut toqoraasarfiup ingerlannerata nangeqqinnissaanut aalajangiisuummat.

Qulaani pineqartut tunngavigalugit siunnersuutip itigartitsissutiginnissaa Naalakkersuisut inassutigaa.